

黃帝陰符經注序

四八

臣聞冥冥之中儼然胞合不可以形言也以形言之上下殊勢疑若有間焉得而胞合哉夫惟此以神與彼以神受通六極為一炁含萬象為一體統乾坤為一物化機一發妙用潛該孰為彼孰為此庸詎知天地之神非吾之神吾之神非天地之神邪昔之至人動與神契靜與神俱動靜之中間不容髮故能與太空為人與造物者為友空性不壞吾體亦然體性无殊是謂得道與道相得乃能物物今古一息也晝夜一照也世之淺人知神之神不知不神之所以神是以役於陰陽囿於變化恣肆轉徙曾莫之悟又豈知冥冥之中儼然胞合者哉此西王母所以闡揚道樞丁寧詳複為黃帝言之也然而聖人之言隱而顯幽而中定觀諸妙冥參真有汎觀諸微默造深玄以此退藏何泥於虛以此進為何拘於實神仙抱一富國安民強兵戰勝特戲事爾然是道也豈他求哉取諸身而足微西王母不能告黃帝此言微黃帝不能受西王母

此道二聖相值若合符節又豈在誦誦問應之間邪著之典常以詔天下來世故曰陰符云爾臣黃居真謹序

黃帝陰符經注

虛靖大師賜紫道士臣黃居真注

觀天之道執天之行盡矣

易曰觀天之神道而四時不忒又曰終則有始天行也天之道運而不積故日月星辰繫焉天之行健而不息故四時萬物由焉至人於其運者觀之則與之相為周流於其行者執之則與之相為終始消息盈虛莫之或違呼吸屈伸未始有沓靜而與陰同德動而與陽同波夫如是又何加焉故曰觀天之道執天之行盡矣

天有五賊見之者昌五賊在心施行于天

人以木火土金水之炁以生亦以金木土水火之炁以死自至人觀之生奚足悅死奚足惡生我者乃所以賊我也知其機識其變金木未嘗相間水火未嘗相悖五者相得混而為一則獨存而常全矣何死生之足計哉順之為天則毀之為賊感其心之自取而施行之則在天也

宇宙在五千萬化生予身

